

**Domingo 2 de febrero 2020 -
Presentación del Señor**



MAITEI OÚVAPE – SALUDO.

Ko árape jaju vy'a pópe ou haguéicha Tupãsy la Candelaria ha San Hose, oguerúvo Hesúpe tupaópe omõi haguã ichupe Ñandejára renondépe. Hesu ha'e hína pe ohesapéva ñande rekove. Ñamyendy háicha pe tataindy ohesape haguã ñande rape, upéicha avei ñaikotevẽ Hesu ojajái ñande resa renondépe ha ñane korasõme ha tomyesakã ñande rekove jaguatávo oñondive.

ORACIÓN COLECTA

Tupã Ñandejára nde pu'akapáva ha opa ára reikovéva rojeruremi ndéve, nde Ra'y peteĩ ete ou va'ekue yvypóraicha, ko árape ojehechauka haguéicha ichupe tupaópe, ore avei toroguahẽmi ne rendápe korasõ potĩ reheve.

Nde Ra'y Hesu krísto rupive, Tupã Ñandejaraite, oikovéva ha ipu'akapáva nendive Espíritu Santo ñemopeteĩme, yma, ko'ága ha opa araité.

ÑAHENDU ÑANDEJÁRAPE –

MOTIVACIÓN A LECTURAS.

Profeta Malaquía he'i Ñandejára omboúta omopotĩva tape ikatu haguãicha oguahẽ ñandéve jehovasa ha salvación. Salmo pe oje'e ñandéve jaípe'a haguã ñande rekove ha ñande róga rokẽ oíke haguã Ñandejára mburuvicha guasúicha.

San Pablo katu he'i Hesu ohasa haguére upe ñande ñande jahasáva ikatu ñane pytyvõ opa mba'épe.

Ipahápe San Luca omombe'u mba'éichapa Tupãsy ou vove tupaópe ogueru imemby, osẽ Simeón ha Ana oguerohory ichupe tetã mburuvicha guasúicha.

PRIMERA LECTURA:

KO'ÁGÄ ÑAHENDÚTA TUPÄ ÑANDEJÁRA ÑE'Ë MALAQUÍAS ARANDUKÁPE OĨ HÁICHA 3,1-4

Ñandejára ipu'akapáva he'i: "Amondóta che rembijokuái ombasako'i haguã che raperã. Pende Jára peẽ pehekáva oikéta itupaópe.

Oguahẽma pe oñemboúva ha ogueru pe ñe'ẽ me'ẽ peẽ peipotáva!"

Ha mávapa ikatúne ogueropu'aka upe ára? Mávapa ikatúne opyta ñembo'yhápe? Oguahẽta tatáicha ñane mopotĩ haguã.

Ha'éta havõicha oipe'áva ky'a ñande hegui. Ñandejára oguapyta omopotĩ haguã pa'ikuéra, Leví ñemoñare, oñemopotĩháicha pláta ha óro tatápe. Upéi ha'ekuéra ikatúta omba'e kuave'ẽ hekópe Ñandejárape.

Upémaramo Ñandejára oguerohoryta Judá ha Jerusalén mba'e kuave'ẽ oguerohory haguéicha ymave.

Tupã Ñandejára Ñe'ẽ.

SALMO ÑEMBOHOVÁI

23, 7-10

R. ÑANDEJÁRA NINGO IMBARETE, HA'E HÍNA UPE MBURUVICHA GUASU.

Peipe'a umi okẽnguéra, nandi topyta, ha toike mburuvicha guasu tuichaitéva. **R.**

Máva piko aipo mburuvicha guasu? Ñandejára hína upéva, upe ipu'akapáva, upe ñorairõme imbaretetéva. **R.**

Peipe'a umi okẽnguéra, nandi topyta, ha toike mburuvicha guasu. **R.**

Máva piko aipo mburuvicha guasu? Ñandejára ojajaipáva, ha'e hína upe mburuvicha tuichaitéva. **R.**

SEGUNDA LECTURA:

ÑAHENDÚTA TUPÄ ÑANDEJÁRA ÑE'Ë OJEHAIVA'EKUE HEBREOSKUÉRAPE

2, 14-18

Che pehenguekuéra: Ta'ýrakuéra ha'eháicha peteĩ to'o ha peteĩ tuguýgui guare , upéicha avei Jesús oiko va'ekue yvypóraicha, ho'o ha huguy reheve, imano rupi ipu'aka haguã Aña, ikatúva oporojukáre.

Ha péicha oipysyrõ opa umi oiko va'ekue kyhyje poguýpe oikove aja pukukue. Añetehápe niko ha'e ndoúi va'ekue oipytyvõvo umi Tupä remimboúpe, ha'e ou oipytyvõ haguã Abraham ñemoñarépe.

Upéva rehe, oiko va'erã va'ekue ipehẽnguekuéraicha opa mba'épe, oiko haguã ichugui peteĩ Pa'i Guasu heko jeroviahava ha oporoporiahuverekokuaáva, mba'apóva Tupãme guarã, ha ojeheja rei haguã yvypórape iñangaipa.

Ha ha'e voi ohasa asy ha ojepy'a ra'ã rupi, ko'ágã ikatu oipytyvõ umi ojepy'a ra'ãvape avei.

ALELUIA Lc 2, 32

Pe tesakã ohesapepátava opa tetãme, ha omomimbipátava ne retã Israelpe.

EVANGELIO


KO'ÁGÄ ÑAHENDÚTA ÑANDEJÁRA JESUCRÍSTO REKOVE HA HEMIMBO'E SAN LUCAS OMOMBE'U HÁICHA. PEJAPYSAKA PORÁTAPA HESE?

2, 22-32 VERSIÓN BREVE:

Oguahẽvo ára oñemopotĩ haguã, he'i háicha Moisés rembiapoukapy, ogueraha hikuái pe mitã Jerusalénpe omoĩvo Ñandejára renondépe.

Ojapo hikuái upéva, upéicha oĩgui Ñandejára rembiapoukapýpe, he'íva: “Opa mitãkuimba'e ijypykuéva oñemboyke va'erã Nandejára peguarã”.

Aipo ramo oho hikuái omba'ekuave'ẽvo, he'i háicha Ñandejára rembiapoukapy: mokõi jeruti, ýrõ katu mokõi pykasu ra'y.



Umi árape oiko va'ekue Jerusalénpe peteĩ kuimba'e hérava Simeón, heko joja ha iporiahuvereko katúva, ha oha'arõva osẽ Israel ñepysyrõva.

Espíritu Santo oĩ Simeón ndive, ha oikuaauka ra'e ichupe nomano mo'ãiha ohecha mboyve pe Mesíaspe, Ñandejára omboútava.

Espíritu Santo ogueraha Simeónpe Tupaópe ipógui, ha oguerahavo mitã Jesúspe itúva ha isy ojapo haguã Tupã rembiapoukapy he'íva, Simeón ohupi pe mitã iyyva ári ha omomba'e guasu Tupãme kóicha:

Ko'ágã, che Jára, rejapóma ne ñe'ẽ: ikatúma reheja omano ko ne rembiguái py'a guapýpe.

Ahechama reñepyrũha reporopysyrõ opa tetã renondépe, pe mba'e rendy ohesapepátava opa tetãme, ha omomimbipátava ne retã Israelpe.

Ñandejára Jesucristo Ñe'ẽ.

JAJERURE ÑANDEJÁRAPE – PETICIONES

Ñañembo'e oñondive ha jajerure Ñandejárape ñaikotevẽ ha jaipotáva. Ha'e ohecha ha oikuaáva opa mba'e, tome'ẽ ñandéve umi mba'e ñanepytyvõtava jaiko porãve haguã oñondive:

R. ORE RENDUMI KENA ÑANDEJÁRA.

1. Pe Hesu tesapeha tahendy ñande rekovépe ha tajaiko oñondive py'a guapýpe ñane retãme, ñande rógape, ñande komunida ha ñande Iglésia pe.
Rojerure ndéve Ñandejára. R.

2. Ñanemandu'ami opaite ñande rapicha hasýva rehe, dengue orekóva. Ñañeha'ã haguã oñondive ñamopotĩ ñande rekoha ha jajoko mba'asy. Avei ani haguã oguahẽ ñande apytépe mba'asy vai mombyrygua.
Rojerure ndéve Ñandejára. R.

3. Ñande komunida, ñande Kapílla ha ñande välle rehe. Oĩve haguã ñande apytépe oñanimáva ojejokuái Ñandejára rérape, oipytyvõ haguã opa tembiapo oñeikotevẽ hápe.
Rojerure ndéve Ñandejára. R.

4. Pe Tupãsy oraha haguéicha Hesu iyyva ári, ñande avei jaraha haguã Hesúpe ñane ñe'ẽ, ñane rembipo ha ñane ñembo'e rupi, ohesape haguã opavavépe.
Rojerure ndéve Ñandejára. R.

5. Ikatu ñambojoapy jajerureséva...

Nde pópe roheja Ñandejára ore remikotevẽ ha ore rembipota. Aníkena nde resarái ore hegui, rojerovaitéva nde rehe. Rojerure ndéve nde Ra 'y Hesukristo rupive. Amén.

ORACIÓN SOBRE LAS OFRENDAS

Tupã ore jára, ema'ẽmi py'a rorýpe, ko kuave'ẽmby vy'a pópe nde Iglesia oguerúva ndévere nde niko remoneĩ va'ekue ohasa asy haguã nde Ra'y peteĩ ete, ichupe oñeikuave'ẽ va'ekue pe Ovecha ra'y imarã'ỹva ramo yvypóra rehehápe.

Ñandejára Hesukristo rupive. Amén.

Se dice Arovia.

PREFACIO DE

LA PRESENTACIÓN DEL SEÑOR

V. Ñandejára toĩ penendive

R. Ha nendive avei.

V. Ñamopu'ãkena ñane ánga

R. Romopu'ãma voi Ñandejára gotyo.

V. Jaaguyjeveme'ẽ Tupã Ñandejárape.

R. Iporã ha tekotevẽ.

Añeteku iporã ha tekotevẽ, ha'e ore rembiaporã ha ore pysyrõ roaguyjeveme'ẽ ndéve opa ára ha opa rupiete, Ñandejára, ore Ru

marangatu, Tupã nde pu'akapáva ha opa ára reikovéva. Ñandejára Hesukrísto rupive.

Oikóvo ichugui yvypóra omyatyrö haguã ore rekove, omanóvo ombogue ore angaipa, oikove jevývo ome'ë oréve tekove pyahu ha oho jevyvo ne rendápe, ore Ru, oipe'a oréve yvága rokẽ.

Upévare, umi ángel ha opa heko marangatúva ndive, ropurahéi kyre'yme ne ñemomba'e guasu:

Imarangatu, Imarangatu, Imarangatu Ñandejára, Tupã opa mba'e Jára. Henyhẽ yvy ha yvága nde rekove mimbipágui.

Osánna yvágape. Jehovasapyre pe oúva Tupã Ñandejára rérape. Osánna yvágape.

ORACIÓN DESPUÉS DE LA COMUNIÓN

Ore Ru, ko'ã sacramento rohupityva rupi eme'ë oréve ne remime'ëte Simeónpe ehechauka haguéicha omano mboyve oikuaasete va'ekue Mesías ehupityukami oréve tekove opa ára guarã rosẽvo Ñandejárape rohuguatĩ.

Ñandejára Hesukrísto rupive. Amén.

JAHAKUÉVO - DESPEDIDA.

Tañanderesape akóinte ko tesapeha marangatu ha'éva Hesu, oguerúva ñande sy Tupãsy ijyva ári. Tahendy opa araité ñande rekovépe, ani araka'eve ogue ñande hegui.

Jaraha

avei ko tesapeha ñande rógape ha opaite jaiko hárupi. Toho penendive Ñandejára Hesukrísto ha tapehasa porãite pende rógape ko semánape.



 misaguaranipy@gmail.com

 0981 615 628

  @misaguarani

CON EL AVAL DE:

